

陝西名勝志卷之二

閩中曹學佺能始著

西安府屬

咸陽縣

在府城西  
北五十里

西京賦曰秦里其朔實為咸陽薛綜注云朔北也  
里居也秦邦居北是為咸陽三秦記以在九嶷山  
南渭水北山水俱陽故名按志九嶷山在今醴泉  
縣界高六十餘丈其山九峰俱峻故名山之麓即  
咸陽北坂渭水西南自興平縣界流入水上舊有  
便門橋即今理也縣南門曰渭陽北右門曰九嶷

其名本此○古咸陽城在縣東二十里亦漢高帝  
元年之新城武帝元鼎三年之渭城縣也隋開皇  
中移於故咸陽城西北三里爲秦杜郵亭址唐武  
德六年始移便橋橋去長安四十里長安西門曰  
便門此橋與門相直故名便橋唐時亦名咸陽橋  
○秦本紀孝公十一年衛鞅築冀闕于咸陽徙都  
之其後惠文王悼武王昭襄王莊襄王孝文王始  
皇帝胡亥竝都于此秦初併六國收天下兵聚之  
咸陽鑄以爲鍊金人十二重各千石置庭中徙天  
下豪富十有二萬戶居焉每破諸侯輒寫倣其宮  
室作之咸陽北坂上南臨渭水殿屋複道周閣相  
屬所得諸侯美人鐘鼓以充之北至九峻甘泉南  
至長楊五柞東至河西汧渭之交東西八百里南  
北四百里離宮別觀相望于道木衣綿繡土被朱  
紫宮人不移樂不改懸窮年忘歸猶不能遍至胡  
亥時天下苦秦四方兵起漢高帝入關秦王子嬰  
降項羽引兵西屠咸陽燒秦宮室三月不滅□長  
安志云秦漢瓦形製精妙雖塵壤漬蝕殘缺漫漶  
破之如新瓦頭皆作古篆盤屈隱起以爲華藻其  
文有作楚字者亦秦瓦也秦倣六國宮室于咸陽

意者必用其國號以別之與○水經註曰渭水又東豐水從南來注之水所滙處無他高山異巒唯原阜石激而已水上有便門橋漢書建元三年造服虔曰在長安西北茂陵東武帝常由長安西門以趨故門口便門橋曰便橋矣渭水又逕太公廟北前有太公碑文字褫缺今無可尋渭水又東北與鎬水合水上承鎬池於昆明池北周武王之所都也故詩云考卜維王宅是鎬京維龜正之武王成之自漢穿昆明池於是地基構淪褫迄無可究春秋後傳曰使者鄭容入柏谷關至平舒置見華山有素車白馬問容安之谷曰之咸陽曰吾華山君使願託書致鄙池君子之咸陽過鎬池見大梓下有文石取以欸扣梓當有應者以書與之勿妄發致之得所欲鄭容行鄙池見一梓下果有文石取以欸梓應曰諾容如睡覺而見宮闕若王者之居焉謁者出受書入又見頃聞語聲言祖龍死卽是處矣鄙水又北流西北注與彪池合水出鄙池西而北流入于鄙毛詩云漉流浪也鄭玄曰豐鎬之間水北流也鎬水北逕漢靈臺西又逕磁石門西門在阿房前悉以磁石爲之故專其目令四夷

朝者有隱甲懷刃入門而脅之以示神故亦曰却胡門也鎬水又北逕于渭渭水北有杜郵亭亭去咸陽十七里今名孝里亭中有白起祠嗟乎擅制勝之功慙尹商之仁是地卽其伏劍處矣辛氏三秦記曰畢陌西北有孝里又有白起墓潘岳西征賦云索杜郵其馬在云孝里之前號惘輟駕而容與哀武安以興悼也渭水又東逕蘭池宮北始皇引渭水爲長池築蓬萊山刻石爲鯨魚長二丈亦其與武士微行遇盜處渭水又逕渭城南文穎曰故咸陽也秦孝公所居有離宮初獻公都櫟陽天雨金周太史儋見曰周故與秦國合而別別五百歲復合合七十歲而霸王出至孝公作咸陽築冀闕而徙都之漢高帝更名新城武帝元鼎三年別爲渭城在長安西北渭水之陽王莽之京城也始隸扶風後併長安□按志鎬京在縣東二十五里介于咸陽長安之間矩原在縣西南二十里前有高山後有此原形方如矩故名鄙池在縣西南二十五里鄙水之原也與彪池水合流入渭又十三里爲杜郵亭昔杜伯見恠于宣王處漢宣帝築杜陵以此爲下杜□蘭池宮在縣東二十五里今名

蘭池陂是漢池陽縣設焉以在池水之陽矣新城渭城今俱屬長安縣界唐王維詩渭城朝雨浥輕塵杜甫詩杏花春雨遍新城蓋指此○帝王世紀云文武成康皆葬于畢左傳畢原酆郇文之昭也蓋武王克商之後以其地封文王子杜預云畢國在長安西北毛詩註畢終南山之道名也南北數十里東西二三百里無山川陂湖井深五十丈謂之畢陌秦謂之池陽原漢曰長平陂也石勒建縣于此又名石安原塚廟記云周文王陵武王陵康王陵俱在縣北十五里周成王陵在西北二十里今縣北左門曰五陵本此○漢長陵高帝陵也在縣東二十五里亦曰長山漢爲縣去長陵三里置唐杜牧之詩小市長陵在卽此也其北有蕭城世傳蕭何所築以守長陵故名漢書呂后六年成之在考漢初徙關東豪族以奉陵邑長陵茂陵各萬戶其餘諸陵各五千戶皆屬太常不隸于郡漢百官注曰長陵令秩千鐘祿入其城有南北西三面而東面無城陪葬諸臣有蕭何張良曹叅紀信各墓俱在其東○安陵漢惠帝陵也去長陵又東十里秦安陵縣周之程邑也雍勝錄云安陵有程地

左傳謂伯休父于此得姓周書曰王季宅於程孟子曰文王卒于畢郢固斯地矣呂后紀云徙關東倡優樂人五千戶以爲陵邑善于啁譏俗號安啁陵□張教冢在安陵東二十里冢上有五岳象今人謂之五角冢長安記引揚雄家誄曰子雲以天鳳五年卒詔陪葬安陵坂上弟子侯芭負土作墳號曰玄塚□陽陵景帝陵也在縣東十五里陽陵城故戈陽縣地景帝五年改爲陽陵縣曹魏省帝王世紀曰陽陵山方一百二十步高四十丈雍大記云今屬高陵縣祭□平陵昭帝陵也在縣東北一十三里有平陵縣去陵一里置漢書曰帝作陵制令流水而已石槨廣一丈二尺長二丈五尺東北作廡長三丈五步外爲小厨裁足祠祀萬年之後掃地而祭□渭陵元帝陵也與平陵同里漢書曰王莽使壞渭陵園門曰勿使民思漢氏云□延陵成帝陵也在縣西北十五里三輔舊事曰成帝作延陵及起廟竇將軍有青苗地在廟角恐犯蹈之放言作陵不便乃徙昌陵涉渭取土與粟同價不成仍就延鄉□義陵哀帝陵也在縣西八里漢書臣瓚曰義陵屬右扶風去長安四十六里以今

攷之正是其處○康陵平帝陵也在縣西二十五里謂之康陵坂按漢諸陵置邑者七渭延義三陵以下不復置○唐代祖元皇帝興寧陵在縣東三十五里之五雲鄉周五里○縣東五里望賢宮唐開元時建玄宗幸蜀還肅宗奉迎之于此○周公墓在縣東十五里尚書曰周公薨成王葬于畢以不敢臣周公故使近文武之墓○太公墓在縣東北二十里鄭玄曰太公受封于齊留爲太師五世之後乃歸葬于齊○周八士墓在縣東北五十里○漢婁敬墓在縣東北三十里○周勃墓在縣東北四十里按縣有周氏陂在城東南三十里勃以安劉功賜此陂因以氏稱焉七國反勃屯軍于細柳營距縣西南三十里今名細柳倉近石徼地三輔故事曰周亞夫軍于細柳今石徼是也○鈕麀冢蒙恬冢李左車冢馮唐冢唐尉遲敬德冢俱在縣境○雍勝錄云唐史肅宗在彭原召房瑄爲先鋒收兩京戰于陳濤斜又李晟與懷光會于咸陽之陳濤斜今俱失其故處斜亦墓之類也或曰斜者山澤之稱故又名陳陶澤杜甫有悲陳陶詩蓋傷其事葛常之詩話云瑄臨敗猶持重中人邢延



陝西各縣志 卷之二  
恩促戰遂大潰故子美悲之按陳陶斜亦名咸陽  
斜在長安城西北舊屬咸陽

興平縣

在府城西  
一百里

周犬丘之地秦始皇曰廢丘項羽封章邯爲秦王  
都此漢高帝三年改置槐里縣武帝析置茂陵縣  
昭帝復析置平陵縣魏黃初中改爲始平縣故晉  
及後魏設始平郡于此唐景龍時郡廢改爲金城  
縣治馬嵬肅宗至德二年始爲興平縣今治所在  
槐里故城南口按犬丘周懿王奔狄所都國語秦  
仲之子莊公伐西戎復其地爲西垂大夫者也以

此地久廢于戎故曰廢丘亦曰舒丘後漢桓帝封  
皇甫嵩爲侯國○章邯臺在縣東南十里文學武  
學二城在縣東十一里各崇一丈五尺相傳俱邯  
所築十道志曰永安初移扶風縣于文學城治卽  
此今謂之故縣城○注水經云渭水又東逕槐里  
縣故城南其道途左右悉種槐樹漢書槐里環隄  
是也王莽更名槐治世目之爲大槐里其城遙帶  
隍陸舊渠尚存又有小槐里李奇曰卽槐里之西  
城矣魏志太祖以陽阜爲武都太守徙其郡于小  
槐里百姓襁負從之○城塚記云漢武帝葬槐里

之茂鄉故號其陵曰茂陵高十四丈方一百四十步三輔舊事曰武帝於槐里茂鄉徙戶六萬一千置茂陵縣有龍淵廟在縣東北二十四里武帝廟號也○茂陵西北有李夫人冢冢形三成俗謂之英陵有臺名習仙臺高二十丈周二百六十步○衛青墓霍去病墓俱在縣東北十九里近茂陵衛青冢象廬山去病墓象祁連山○公孫丞相弘墓去衛霍冢一里○霍光墓在茂平二陵間光葬詔賜黃腸卽柏心也耕者時時得栢木如槩形謂之栢槩○平陵城與茂陵城相去二里魏黃初改名始平以始平原爲名也原長數百里其人井汲巢居泉深可五十丈長安志云始平原在縣北亦名北芒巖漢富人袁度于此築園激流注其中構石爲山高十餘丈連延數里養白鸚鵡紫鴛鴦旄牛青兕後皆徙置上林苑焉○黃山宮在縣西南三十里宮闕簿曰漢惠帝二年建東方朔傳云武帝微行西至黃山宮遇盜處按在澇水入渭之下渭直宮南揚雄甘泉賦北繞黃山者也或謂卽北芒之西坂庾肩吾詩黃山開廣路王維詩黃山舊繞漢宮斜皆指此○金城縣在縣西二十五里本馬

鬼城唐景龍四年車駕送金城公主至縣因改爲金城也孫景安征遼記曰馬嵬人名舊傳于此築城避難未詳何代十六國春秋姚萇時扶風王駢以數千人保馬嵬故城是也唐天寶末玄宗西幸次馬嵬驛爲禁軍不發縊殺楊貴妃于此有冢存□長安志曰史家泉在楊妃冢西冢上有端正樹又云馬嵬泉在驛北周數十步深百尺流入白渠唐杜仝詩楊柳依依水拍隄春晴茆屋燕爭泥海棠正好東風惡狼籍殘紅襯馬蹄□開天遺事云大定代楊貴妃製羅襪銘妃死遺襪一雙往來觀者出百錢爲稅收之人因以致富故劉禹錫過馬嵬坡有不見巖畔人空遺凌波襪之句○寰宇記云馬牧澤在縣東南二十里南北廣四里東西二十一里按卽長安志之四馬務也第一曰飛龍務次大馬務次小馬務次羊澤務凡三百七十頃南渡渭河又百頃澤在縣西二十五里周廻十六里多蒲魚之利亦渭水南所溢爲澤云○星石在縣治內郡國志云晉穆帝時有星隕縣西南汗澤化爲石色黃白形如甕高五尺唐韓琮爲興平令移置縣齋題詩云

的的墜芊芊蒼茫不記年幾逢疑

虎將應逐犯牛仙擇地依蘭畹題詩間錦箋何時  
成五色却上女媧天○塚廟記云原氏阡在縣境  
漢書原涉自以先人墳墓儉約乃大治起家舍初  
武帝時京兆尹曹氏葬茂陵人民謂其道爲京兆  
阡涉慕之買地開道立表曰南陽阡人不肯從謂  
之原氏阡○漢馬融墓在縣西南三里俗呼馬蓮  
塚○晉王嘉塚在縣東北一里字子年撰拾遺記  
者○韓信廟在縣東南十里信從高祖屯軍於此  
故祠之○董宣廟在縣北門內強項令也元時茅  
輔有詩吊之○丁蘭廟在縣北五里孝子村河內  
人卒葬于此有塚存

臨潼縣

在府城東  
六十里

本驪戎國秦驪邑也漢高帝七年置新豐縣後漢  
靈帝末移安定郡之陰盤縣寄理于此封段熲爲  
盤侯亦謂之陰盤城後魏太和申復移陰盤于縣  
東二十里司馬村故城內其新豐縣自陰盤寄理  
後移徙不一唐垂拱二年改新豐爲慶山縣天授  
中于此置鴻州別置鴻門縣附郭未幾州縣俱廢  
復爲新豐縣玄宗天寶初析置會昌縣于溫泉宮  
七年改會昌爲昭應以新豐省入宋大中祥符間

避玉清昭應宮名改曰臨潼以臨潼水爲名潼水  
詳潼關下攷新豐縣距府城東五十里凡自長安  
東出而趨潼關必由此故漢文帝指新豐示慎夫  
人曰此走邯鄲路也言出關而向邯鄲此其東趨  
之始也○驪戎故城在縣東二十四里西京道里  
記曰城高一丈五尺周廻四里昔晉獻公納驪姬  
于是處○驪山在縣東南二里山海經云驪山其  
陽多寶玉其陰多黃金溫泉水出焉左右皆峻嶺  
雲霞繡錯因有繡嶺之名東南山谷中有石若斧  
形以杖觸之則動取之輒不出謂之金斧山亦名  
金谷也衛宏古文奇字序云秦旣改古文爲篆隸  
恐天下不從乃密令冬月種瓜于驪山谷中溫處  
皆熟詔博士諸生說之前後七百人人各異則  
皆使往視因伏機陷之後人號其處曰坑儒谷唐  
天寶中改爲旌儒鄉立廟賈至作碑○三秦記云  
始皇作閣道至驪山八十里人行橋上車行橋下  
今石柱猶存山上立祠名曰露臺不齋戒往則風  
雨迷道城塚記云秦始皇陵在縣東八里驪山下  
役徒七十萬人積年之功蓋以驪山水泉本北流  
皆陂障使東注北逕始皇陵下水積成池謂之魚

池又此山無石取于渭北諸糜費工力由此也有  
很石距陵北里許始皇遠採將致之驪山至此不  
復動石形似龜高一丈八尺周廻十八步皇甫湜  
有俱石銘唐中宗秦始皇陵詩眷言君失德驪邑  
想秦餘政煩方改篆愚俗乃焚書阿房久已滅閣  
道遂成墟欲厭東南氣翻傷掩鮑車○新豐城在  
縣東十八里新豐原下漢高以太上皇思東歸乃  
于此置縣徙豐人以實之故曰新豐併移枌榆四  
社街衢棟宇一如舊制士女老幼各知其室雖鷄  
犬混放亦識其家西京雜記以爲胡寬所營矣別  
本曰太公平生所好皆屠販少年酤酒賣餅鬪鷄  
蹴鞠以爲歡故新豐少衣冠子弟多無賴少年所  
居唐王維詩新豐美酒斗十千長安遊俠多少年  
○後漢書延光二年鳳凰集新豐有鳳凰原在縣  
東北十里之鸚鵡谷中層崖疊壑飛淙瀑水世語  
云谷水清天下平指此也唐韋嗣立于此構別廬  
中宗嘗臨幸之賜名幽棲谷○注水經云冷水出  
浮肺山戲水出驪山鴻谷又北歷戲亭東卽周章  
軍西至戲秦將章耶拒破之者浮肺山蓋驪山之  
別麓有百丈水亦冷水之異名歷陰盤新豐兩原

間北流于渭故後魏地圖記于冷水西戲水東移  
理陰盤城矣周書云幽王滅于戲史記幽王以申  
侯女爲后又愛褒姒之子伯服爲太子申侯怒乃  
與犬戎共攻王殺之驪山之下虜褒姒取周賂而  
去潘岳西征賦曰履犬戎之侵地疾幽王之詭惑  
舉僞烽以沮衆淫嬖褒而縱匿軍敗戲水之上身  
死驪山之北赫赫宗周滅爲亡國者也按戲水在  
縣東二十七里以幽王與褒姒遊戲于此故名史  
記項羽軍至戲欲攻沛公卽此地○鴻門坂距戲  
水十里舊大道坂口卽沛公見項羽處故唐之鴻  
州及鴻門縣以此名也注水經云新豐原坂長二  
里餘塹通原道南北洞開有同門狀謂之鴻門至  
霸城五十里內有曲郵亭相傳爲張良追高祖者  
○慶山在縣東南三十五里唐武后時忽風雷湧  
出此山初高六尺餘漸高至三百餘尺武后以爲  
祥因曰慶山而設縣焉荊州喻文俊上書曰地氣  
不和而堆阜出今陛下以女主處陽位山變爲災  
反以爲慶何也后怒貶之嶺外給事中魏璘曰地  
生骨堆何足爲慶竟賜死○昭應縣舊新豐縣也  
初玄宗每歲十月幸溫湯以新豐縣去湯稍遠故

廢新豐而立會昌其昭應則自會昌改者王建昭  
應縣官舍詩繞廳春草合知道縣家閒行見雨遮  
院臥看人上山避風新浴後請假未醒間朝客卑  
新吏從他不往還○溫泉在驪山西北麓漢武故  
事曰秦始皇于此砌石剏宇武帝遊幸加修飾焉  
三秦記云入湯瀕以三牲祭之不爾則爛人肉張  
衡賦序云余適驪山觀溫泉浴神井嘉洪澤之普  
施乃爲之賦今按泉有三其一所名皇堂石井周  
武帝天和四年大冢宰宇文護所造隋文帝列樹  
松柏唐開元十年置溫泉宮于此天寶六年改爲  
華清宮又築會昌城卽於湯所置百司及公卿卽  
第又造長生殿以祠神玄宗與楊太真歲常幸焉  
故長慶集有七月七日長生殿夜半無人私語時  
之句□開天遺事云貴妃生日宴長生殿南方適  
進荔枝故以荔枝香爲曲杜牧華清宮絕句長安  
迴望繡城堆山頂千門次第開一騎紅塵妃子笑  
無人知是荔枝來□長安志云長生殿齋宮也天  
子有事於朝元閣卽齋沐此殿山城內多馴鹿飲  
澗水因號飲鹿泉及金沙洞玉蘂峯皆玄宗所命  
名又有笋殿殿側有魏溫泉堂碑其石瑩澈見人



形影宮中號瓏黎碑玉建溫泉宮行十月一日天子來青繩御路無塵埃宮前內裏湯各別每箇白玉芙蓉開朝元閣向山上起城繞青山龍暖水夜開金殿看星河宮女知更月明裏武皇得仙王母去山鷄書鳴宮中樹溫泉泱泱出宮流宮使年年修玉樓禁兵去盡無射獵日西麋鹿登城頭梨園弟子偷曲譜頭白人間教歌舞○櫟陽廢城在縣北五十里史記秦獻公二年自雍徙都此漢元年項羽封司馬欣爲塞王都櫟陽故冷水東戲水西有司馬村也高帝定關中亦嘗都之七年始之長

安王莽改曰師高後漢建武二年封驃騎景丹爲侯國丹辭世祖曰富貴不還故鄉如衣錦夜行故封卿耳○按封禪書秦獻公時櫟陽雨金自以爲得金瑞遂作畦時以祀白帝註云畦時形如韭畦各一土封也在櫟陽廢縣東北三十里郡國縣道記云漢葬太上皇於櫟陽北原因置萬年縣于櫟陽大城內以奉陵邑注水經云沮水東逕萬年縣故城是矣○寰宇記云清水陂在縣西南十里多水族之利煮鹽澤在縣南十五里澤多鹹鹵苻秦于此煮鹽周廻二十里○長安志云昌平驛在故

縣西南五十里三輔黃圖以漢成帝于步昌亭起  
昌陵取土東山與粟同價糜費巨萬積年無成卽  
此處也○安墓坳在縣東二十里相傳漢高帝幸  
新豐時安營幕于此又二十里爲零口鎮以泠水  
得名○靈臺觀在零口店北二百步唐天寶初供  
奉睦霞奏置○寶雲寺在零口鎮市東坡上去縣  
三十六里隋開皇中置號靈巖寺寺有飛閣緣複  
道而上亦名鷲嶺寺○福嚴寺在縣之南山半腹  
臨石甕谷懸泉激石有似甕形舊名石甕寺宋太  
平興國始改今名唐開元中以造華清宮餘材修  
繕上有層樓比丘懸轆轤于欄楯斜引修綆長二  
百餘尺以汲甕泉出于紅樓喬樹之杪殊稱險絕  
樓上有玄宗題詩草八分每句爲體及王維山水  
兩壁按儲光義有石甕寺詩沈佺期有紅樓院應  
制詩俱卽此寺前孔雀松下有赤茯苓入土千年  
成琥珀○塚廟記云漢馮衍墓在縣東十四里衍  
字敬通卽爲郎不調者○唐段秀實墓在縣西十  
五里三輔會要云斜口鎮有段烈士廟卽秀實太  
尉祠也許渾絕句徒想追兵緩翠華古碑荒廟閉  
松花紀生不向滎陽死豈有山河屬漢家○僧一

陝西各州志 卷之二  
行塔在銅人原明皇幸溫湯時駐馬塔前徘徊而去○白鹿觀去縣西南十五里本名驪山觀以唐高祖幸溫泉宮旁觀川原見有白鹿遂改今名觀內有老母殿升仙臺蟾井□拾遺記云白鹿觀井中有金色二蝦蟆賀蘭先生見之曰此肉芝也烹而食之白日昇天○楊大年談苑云驪山絕頂有翠微寺本唐武德初之太和宮也貞觀勅名翠微宮太宗嘗避暑其上又于此地上仙後改爲寺日久旋廢有題詩者云翠微寺本翠微宮樓閣亭臺數十重天子不來僧又去樵夫砍倒一株松

涇陽縣

在府城北七十里

秦舊縣本紀昭王封同母弟悝涇陽君十五年以爲質于齊請孟嘗君者漢地理志云涇陽屬安定在今平涼府屬詩云侵鎬及方至于涇陽是矣按當縣卽漢惠帝之池陽縣後魏之咸陽郡也隋文帝罷郡移涇陽縣理此○寰宇記云涇水發源峽頭山西北自醴泉界經縣南七里東南入高陵縣注于渭左傳襄十四年諸侯伐秦濟涇而次秦人毒涇上流師人多死按卽今睢城渡漢唐之通津也津口有橋曰涇橋述異記云漢武帝祠甘泉至

此見女人浴于涇水乳長七尺問東方生以爲齋  
祀不潔則見近東曰花池渡通長安又東曰宋村  
渡通臨潼○郡國志云望夷宮北臨涇水秦始皇  
建二世夢白虎嚙其左驂心中不樂卜涇水爲祟  
齋于望夷宮欲祠涇沉白馬趙高使其婿閻樂弑  
之于是處矣□長安志云秦望夷宮在縣東南漢  
池陽宮在縣西北各距八里池陽舊城俗名迎冬  
城城內有尹吉甫碑去縣二十八里○寰宇記云  
龍泉陂在縣南二里周迴六里多蒲魚之利石安  
原在縣西南七里高二十丈東西三十八里南入  
咸陽縣界十六國春秋後秦苻健登之而嘆曰美  
哉斯原有終焉之志也○志云縣北有豐稔原近  
冶谷口曰輿車原抵洪門監曰西城原又冶谷東  
岸曰百頃原西岸曰豐樂原東南岸曰清涼原其  
勢蜿蜒不盡或濶或狹隨在殊稱○百頃原北爲  
文川水村花卉遠望如畫自清涼原折而西乃唐  
李靖故居其地時有仙樂出焉洪門一名洪口亦  
瓠口之訛也白渠所經○寰宇記云太白渠在縣  
東北十里有中白渠首受大白渠水與南白渠水  
俱東流入高陵界○焦穫藪在縣北亦名瓠口卽

爾雅十藪之一詩云獫狁匪茹整居焦穫者也河渠書韓水工鄭國說秦孝公令鑿涇水自中山山西抵瓠口爲渠水經注云涇水東南流經瓠口鄭白二渠出焉當時民得其利歌曰田於何所池陽谷口鄭國在前白公在後舉重成雲決渠爲雨涇水一石其泥數斗且溉且糞長我禾黍衣食京師億萬之口按白渠起于趙國中大夫白公奏穿渠引涇水起谷口出于鄭渠南故名白渠漢左內史倪寬又於此渠上流開六小渠以補助之定水令以廣溉田名六輔渠○注水經云渭水又東得白渠口又東南逕池陽城北縣在池水之陽故以名之也枝瀆出焉東南逕藕原下得冶谷口水○一統志云冶谷水出縣西北之冶谷經嵯峨鄉在縣北五十里嵯峨山下亦云慈峨山山巔雲起輒雨按嵯峨字音截齧與慈峨音異但嵯峨山之東別有慈峨山故俗訛爲一耆老相傳黃帝昔鑄鼎于是山也長安志以嶽業山屬三原縣界冶谷屬淳化縣界然其地皆得有之○振錫寺在嵯峨山上唐元和中建山頂有三峰東曰鉢盂臺中曰仰天池西曰石窟次西有二峰漸低小不得竝又二十里

爲仲山○圖經云仲山北接嵯峨西拒冶谷南竝九嶷涇河自中而出故名中山後訛爲仲俗傳漢高帝兄劉仲所居上有仲子廟歲旱圍此射獵則有風雨其山出竹箭按唐折衝府之一曰仲山府其名本此仲山有泉曰小師泉冬夏不溢不涸□城塚記云唐德宗崇陵在嵯峨山宣宗貞陵在仲山○寰宇記云甘泉山在縣西北百二十里亦名石鼓原甘泉水出焉漢甘泉宮在其上揚子雲作賦夢吐鳳于楮上者東方朔記曰漢武幸甘泉至長平坂上馳道有蟲盤而伏地赤如生肝狀頭目口鼻耳齒皆具先驅旄頭馳還以聞方朔從在後上使往視之還對曰秦始皇拘繫無罪衆庶恨怨憤氣所生是地必秦之故獄處也詔丞相孫弘按圖地果然上曰善當何以去之朔曰積憂者得酒而忘寘酒其上必消以酒澆之其恠遂息上大笑曰東方生真先生因賜帛百匹按長平坂在縣西南五十里漢長平觀在坂上○三秦記曰漢鈞弋夫人居甘泉宮三年不返遂卽其地葬焉名爲思合墓雲陽記曰鈞弋夫人從武帝至甘泉而卒尸香聞十餘里昭帝卽位更葬之棺空但有絲履又

以武帝思鈎弋夫人爲起通靈臺於其泉宮有一  
青鳥集臺上往來至宣帝時乃止○志云縣東南  
隅有唐十八學士所登瀛州故址臺垣東西相向  
柱礎猶存其地名東甫村○塚廟記云漢第五倫  
墓在清谷口今名第五村李陵母墓在仙法村夏  
侯淵墓或作夏侯勝墓在蔣村已上二村俱屬雲  
陽鎮按雲陽故縣詳邠州淳化縣下但唐天授間  
析雲陽置鼎州者則屬當縣之長街鎮○志云牛  
首池在渭水南秦上林苑傍牛首池也池中有自  
生之韭一名韭澤○仇里渡近呂不韋宅史記不  
韋少年報其父仇此渡近其家云

高陵縣

在府城北  
八十里

本秦舊縣昭王封同母弟顯爲高陵君范曄說秦  
王曰高陵進退不請卽此漢隸左馮翊後漢書左  
馮翊自長安出治高陵者也曹魏改爲高陸隋復  
舊名唐析置鹿苑縣旋廢○按志左馮翊城在縣  
西一里鹿苑故城在縣南二十五里三輔黃圖曰  
高陵有果園鹿苑縣名取此鹿臺祠在鹿苑原上  
百姓祈禱水旱有驗今號鹿臺將軍○長安志云  
渭水自咸陽縣界來西南距縣二十里有涇水自

涇陽縣界來注之並流入櫟陽城南○白渠自涇陽界三限下中限為一渠流至彭城兩下分為四渠按唐寶曆間縣令劉仁師請更水道渠成故名彭城堰○水經注云白渠又東枝渠出焉東南逕高陵縣故城北地理志曰左輔都尉治王莽之千春也太康地記謂之曰高陸車頻秦書曰苻堅建元十二年高陸縣民穿井得龜大二尺六寸背文負八卦古字堅以石為池養之十六年而死取其骨以問吉凶名為客龜大卜佐高夢客龜言我將歸江南不遇死于秦高于夢中自解曰龜三萬六千歲而終終必亡國之徵也為謝玄破于淮肥自縊新城浮圖中秦祚因即淪矣○寰宇記云龍躍宮在縣西十四里唐高祖龍潛處武德六年置宮德宗改為脩真觀內有神堯御容御井靈柏翰林學士吳通微撰碑沈佺期龍池應制龍池躍龍龍已飛龍德先天天不違池開天漢分黃道龍向天門入紫微邸第樓臺多氣色君王鳧鴈有光輝為報寰中百川水來朝此地莫東歸○塚廟記云後秦二王冢在縣東十三里即姚萇姚興也○唐西平王李晟墓在縣東南十里裴度撰碑柳公權書



陝西各縣志卷之二  
十三  
○長安志云崇皇寺在縣南十里奉正原世傳漢文帝誕生于此○正道觀在縣北十三里有吳道子畫今存○法隆院在縣南十五里唐大曆元年置○唐韋應物高陵書情直方難爲進守此微賤班開卷不及顧沈埋案牘間兵凶久相踐徃役豈能閒促戚不可哀寬政身致患日夕思自退出門望故山君心倘如此携手相與還按沈作詰傳曰應物嘗爲京兆功曹攝高陵令故作此詩○于志寧宅在縣治西志寧字仲謐高陵人爲唐高祖記室識褚亮于囚虜中引與同列貞觀二年遷中書

侍郎卒

鄠縣在府城西  
南七十里

漢縣秦之鄠其泉也其亭在縣南五里以在其水之東而名尚書夏啓伐有扈誓師于其之野是矣故鄠城在縣北二里卽扈國也春秋左氏傳夏有觀扈杜預曰鄠縣有扈鄉按至秦始改爲鄠○扈水出扈陽谷今名馬腹陂唐韋應物扈亭西陂作杲杲朝陽時悠悠清陂望嘉樹始氤氳春遊方浩蕩綠野際遙波橫雲分疊嶂公堂日爲倦幽襟自茲曠○水經注云扈水上承扈陽池殷爲崇侯虎

國文王伐之故詩云旣伐于崇作邑于鄆也鄆宮在縣東五里周武王雖遷鎬而豐宮元不改每遇大事皆步自宗周而往以其事告于鄆廟示不敢專也距豐宮二十五里卽文王靈囿之地中有靈臺高二丈周圍百二十步詩所云經始靈臺者春秋晉惠公十一年秦晉戰于韓秦獲晉侯以歸舍諸靈臺故唐魏王泰括地志云辟雍靈沼無復故基惟靈臺介然孤立矣○寰宇記云縣理終南山下有五林山牛首山鷄頭山皆終南之支也水之大者爲豐而澇谷檀谷太平谷諸水入焉同注于渭故尚書云豐水攸同以同于渭矣按郊祀志鄆有五林今此山在境內□牛首山在縣南二十五里班固西都賦繞黃山而款牛首者也澇水出焉而注于澇是多飛魚狀似鱗可已痔疾山海經云此山有鬼草其葉似葵其秀如禾服之使人不憂按志牛首山之東有白雲山與縣相直又東有圭峯以形似而名○鷄頭山在縣東南三十里十六國春秋云僞趙主苻生棄長安欲西上隴士卒散盡遂入鷄頭山爲追兵所害是矣○豐水出終南山豐谷東流入縣南詩云豐水東注維禹之績老

子云豐水出深十仞而不受塵垢金鉄在中形見于外者也有龍臺澤一名觀水在豐水西北上林賦所謂登龍臺卽此馬祖壇在龍臺澤中每歲太常太僕四時祭焉春祭馬祖夏祭馬先秋祭馬社冬祭馬步○長安志云高觀谷水濶三步深一尺其底並碎沙石北流入豐水去今縣東南三十里○志云豐谷內有石穴龍潭極靈有石刻宋縣令祀高觀谷留懋龍潭題名而去刻在棲禪寺石壁寺爲姚秦所造請鳩摩羅什譚經其中本名草堂寺唐易以今名○澇谷水出終南之澇谷涇縣里西北經蕢陽宮漢地里志云鄠縣有蕢陽宮秦孝文王所築宣帝甘露二年冬幸焉在縣西南二十三里○澇陂在縣西二里其始自胡公泉與西南諸水合而爲陂同澇谷水以入于渭有澆陂水來注之十道志云澆陂者以其產五味魚甚美也陂周十四里唐寶曆間勅澆陂令尚食禁採捕文宗始勅還府其水西北流入澇澇澆二陂之間有宜春觀漢武帝所造唐杜甫秋興詩昆明御宿自逶迤紫閣峯陰入澆陂紅稻啄餘鸚鵡粒碧梧棲老鳳凰枝佳人拾翠春相問仙侶同舟晚更移彩筆

昔曾干氣象白頭吟望苦低垂按子美有同岑參  
兄弟遊漢陂歌行此作益追憶其事○檀谷水長  
安渠水之上流也源亦出終南山與太平谷水同  
源隋置太平宮以對此谷而名宋程顥遊此有記  
顥字伯淳以嘉祐進士調鄠縣主簿云○塚廟記  
云禹王廟在縣之禹泉鄉按卽瀦泉也近日民間  
得聖水觀碑記係元丞相賀仁傑父賁所立今移  
置廟左按聖水觀原以禹泉而名去縣東南三十  
里又其地有周王季陵王季文王之父也○漢陳  
平墓在縣南十里方勝村婁敬墓在縣北三里之  
婁村○漢書朱雲字游本魯人成帝時上書折檻  
幸不死常居鄠田間出乘牛車从遊諸生所過皆  
敬事焉薛宣爲相雲往見之宣備賓主禮留雲宿  
从容謂雲曰在田野久無事且留我東閣可以觀  
四方奇士雲曰小生乃欲相吏耶宣不敢復言○  
北朝李順興石像在雲際山大定寺順興自魏孝  
帝時隱居此山誦持金剛經聚疊瓦塔以記之其  
地舊爲寺隋大業初以賜駙馬都尉尉遲安夢一  
老人素服謂安曰此古寺基何不再葺之因掘得  
順興先生像云

藍田縣

在府城東南九十里

周禮玉之美者曰球其次曰藍此山出玉故曰藍田秦置縣漢魏因之後周析置玉山白鹿二縣玉山卽藍田山也杜子美九日藍田山莊詩有藍水遠從千澗落玉山高並兩峯寒之句今南關外千澗橋沿其名○白鹿縣以城西五里白鹿原而名相傳周平王時白鹿遊此晉書苻融與桓冲戲于白鹿原卽其地三秦記云鹿原東有霸川之西坂故芷陽也括地志云芷陽去雍州藍田縣六里秦悼太子塚在焉○雍勝錄云白鹿原者南山之麓坡陀爲原也東西十五里南北二十里自南山分行至藍田以及漢城之東霸水行於原上凡霸城芷陽霸上霸陵皆此原也○先儒呂氏考古圖云簋屬白首父敦得于藍田白鹿原皆徑六寸五分深二寸容二升半銘十有六字又張仲簋得于藍田縣中形制皆同縮七寸有半衡九寸有半深二寸容四升唇蓋有銘皆五十一字周宣王所鑄○長安志云藍田故城在縣西十一里城內有勝因寺卽唐法池寺也寺舊有池張說有藍田法池寺二法堂讚大中後改今名○寰宇記云藍田有古

華胥氏陵括地志以藍田山中三皇之所居矣范  
計然曰其山出玉英去縣西三十里亦名覆車山  
郭緣生述征記謂山形如覆車之象也漢書昭帝  
元年於覆車山鑄一鼎高三尺受五斗刻其文曰  
宜君王和四方卽此山矣○史記漢李廣屏居藍  
田山下嘗出獵見草中石以爲虎而射之中石沒  
羽視之石也杜甫詩故將移住南山邊短衣匹馬  
隨李廣看視猛虎終殘年○藍田有虎侯山祠秦  
孝公時置後魏風土記云山巔方二里劉雄鳴學  
道之所雄鳴縣人少以射獵採藥爲事居覆車山  
晨夜行雲霧中不迷其道入因謂之能作雲霧有  
祠甚嚴仙聖所遊集也又有王順山咽瓠泉湘子  
洞涼風原石門溫湯諸處俱載異踪○按志王順  
山在縣東南二十里以道人王順居之唐置謁仙  
祠有藍谷水發源秦嶺西流經藍橋過王順山下  
藍橋卽裴航遇雲翹夫人以詩酬荅處航遂升仙  
○咽瓠泉在縣北十七里唐李荃遇驪山老母授  
以陰符經旣畢令荃携瓠汲泉因而不見故名舊  
有古桂一根植此泉畔○湘子洞在縣南四十里  
唐韓湘之所隱也韓愈示姪湘詩有雲橫秦嶺家

何在雪擁藍關馬不前之句相傳韓湘洞在模糊關南○石門溫泉在縣西南四十里此地雪落卽融唐時有異僧見之云必溫泉也已而掘之果然凡有病者浴之輒愈後有白魚之瑞神女屢降立玉女堂於泉側明皇賜名大興湯院王維遊石門精舍詩落日山水好漾舟信歸風翫竒不覺遠因以綠源窮遙愛雲木秀初疑路不通安知清流轉偶與前山通舍舟理輕策果然愜所適老僧四五人逍遙蔭松柏朝梵林未曙夜禪山更寂再尋恐迷誤明發更登歷○涼風原距縣西五十里南接石門山北入故萬年縣界道甲關山圖云驪山之西有涼風原亦雍州之福地也又有水井在終南玉案山近長安界井深數丈水落井中輒作冰經夏不消長安不藏冰但于此井取之○寰宇記云藍田關卽秦之嶢關也史記沛公引兵攻嶢關未下踰箕山擊秦軍大破之按嶢嶺在縣南二十里又東南卽蕢山秦置蕢山縣于此嶢關在縣東南九十里一名藍田關後周武成中自嶢關置清泥故城側改曰清泥關晉桓温伐苻健使將軍薛珍擊清泥城破之卽此處縣理卽嶢柳城後周建德

中復改青泥關爲藍田關杜氏通典云七盤十二  
絳皆藍關之險路也唐貞元初刺史李西華自藍  
關至內鄉開新道七百餘里迴山取途人不病涉  
謂之偏道○按志青泥城在縣南七里嶢柳城卽  
今治也縣東南三十里有思鄉城舊說宋武帝入  
關築城于此南人思鄉因以名之又其傍多柳故  
亦名柳城○注水經云渭水又東過灊陵縣北霸  
水從縣西流注之水出藍田縣藍田谷所謂多玉  
者也本名滋水秦繆公欲章盛霸功改名霸水焉  
西北有銅公水次東有輞谷水二水合流而西注  
之又西流入渥水渥水又西逕嶢關北歷柳嶢城  
魏置清泥軍於城內世亦謂之清泥城泥水又西  
北流入霸霸水又北歷藍田川逕藍田縣北竹書  
梁惠成王三年秦子向命爲藍君蓋向之故邑矣  
川有漢臨江王榮冢景帝以罪徵之將行祖於江  
陵北門車軸折父老泣曰吾王不反矣榮至中尉  
到都急切責王王年少恐而自殺葬於是川有燕  
數萬噉土置冢上百姓矜之而立冢焉霸水又北  
長水注之水出杜縣白鹿原其水西北流謂之荆  
谿谿水又西北左合猗柳川水水有二源西川上



承磈山之欹槃谷次東有苦谷二水合而東北流  
逕風涼原西關中圖曰麗山之西川中有阜名曰  
風涼原在磈山之陰卽是原也其水傍谿北注原  
上有漢武帝祠其水右合東川水出南山之石門  
谷西北歷風涼原東又北與西川會東逕白鹿原  
原上有狗柳堡三秦記曰襄公時有大狗來下有  
賊則狗吠之故一堡無患川得斯目焉川水又北  
逕杜陵縣東漢宣帝元康年更自杜陵縣王莽之  
饒安也其水又北注荆谿荆谿水北入霸水又有  
溫泉入焉水發自原下入荆谿水亂流注于霸俗  
謂之漚水史記音義文帝出安門注云在霸陵  
有故亭卽郡國志所謂長門亭也漚水出京北藍  
田谷北西北流與一水合水出西南莽谷東北流  
注漚水漚水又北歷藍田川北流注于灞水合蓼  
子澗澗水出縣南山西北流合輞谷水○雍勝錄  
云霸水出商州上洛縣西北行至藍田縣境始出  
谷谷卽驪山之口亦名藍田山也輞谷水谷當縣  
正南八里川口爲兩山峽無路量勢鑿石行之計  
三里許甚險隘過此則豁然開朗村野相望○長  
安志云金山神廟在輞口金山前舊傳黃帝時風

后滅蚩尤之衆於此蓋風后之祠也按郡國志商  
嶺水自藍橋伏流至輞谷如車輞環轉故名有千  
聖洞細水洞錫水洞諸水合之谷內有清源寺本  
宋之問別圃延清有藍田山庄詩卽此及王維摩  
詰奉母供佛山居營草堂精舍仍表乞施爲寺谷  
之首尻凡十三區圍轉而南行二十里至鹿苑寺  
爲右丞別業有孟城坳華子岡斤竹嶺茱萸灣二  
十景右丞與秀才裴迪書云夜登華子岡輞水淪  
漣與月上下寒山遠火明滅林外深巷寒犬吠聲  
如豹村墟夜春復與疎鐘相間此時獨坐僮僕靜  
嘿每思曩昔携手賦詩當待春中卉木蔓發輕儵  
出水白鷗矯翼露濕青臯麥雉朝鮮倘能從我遊  
乎○韓文公祠在秦嶺上嶺居縣東南凡入商洛  
漢中者必越境而後達遇雪則阻韓昌黎阻雪處  
馬跡尚存官爲立祠今秦嶺東西居民以文公爲  
土神祀之○按昌黎集有藍田縣丞廳壁記爲博  
陵崔斯立撰其畧曰丞廳故有記壞漏汚不可讀  
斯立易桷與瓦畫墁治壁悉書前人名氏庭有  
老槐四行南墻鉅竹千挺儼立若相持水瀟瀟循  
除鳴斯立痛掃溉對樹二松日哦其間自後送少

府詩多有哦松之句蓋本此

蓋屋縣 在府城西南 百六十里

山曲曰蓋水曲曰厚地當山水之曲漢縣也唐初  
改宜壽以隋有宜壽宮在縣東南而名至德年復  
○一統志云治西有新食堂唐貞元間建柳宗元  
記為十八年五月日○避世堂在縣東南二十五  
里宋蘇軾序云南溪之南竹林中新建一茅堂予  
愛其所處深邃因以避世名之○漢書注師古曰  
芑竹在蓋屋南界芑水之曲而多竹林也穆天子  
傳曰天子西征至玄池奏廣樂三日是曰樂池乃

植之竹寰宇記云今去縣十三里之司竹園是其  
處周迴百里以供國用故有司竹都尉管領歲終  
以竹功之多少為考課唐義師初起高祖第三女  
平陽公主舉兵於司竹園號娘子軍者也宋嘉祐  
中眉山蘇軾至蓋屋適冬月司竹監燒篁園都巡  
檢柴貽勗左藏以其徒會獵園下子瞻賦詩焉又  
其地有五郡城舊說有義兄弟五人共居此城後  
為道觀唐明皇豎碑蘇軾來遊詩曰古觀正依林  
麓斷居民來說水泉甘亂溪赴渭爭趨北飛鳥迎  
山不復南羽客衣冠朝上象野人香火祝春蚕汝

師豈解言符命山鬼如何託老聃○華陽錄記云  
秦始皇好神仙于尹先生樓南立老子廟晉元康  
中重更修葺時木萬株連亘七里給戶二百供洒  
掃水經注以就水北經大陵世謂之老子陵矣按  
尹先生相傳爲老子之師著尹真人經者有紫雲  
樓在縣東三十里尹先生結草爲樓望紫雲西邁  
處今名樓觀是也晉惠帝時修唐武德改名宗聖  
觀○漢書武帝後元二二年幸長楊宮崩於五柞按  
水經注長楊五柞二宮相去八里長楊本秦宮有  
長楊數畝因名史記司馬相如從帝至上林上疏  
諫獵揚雄作長楊宮賦以諷成帝蓋二帝俱好獵  
故三輔黃圖曰長楊宮門有射熊館秦漢遊獵之  
所矣五柞宮宮門有柞樹五皆連三抱上枝覆蔭  
數畝故名又有青梧觀在五柞南觀前有三梧桐  
按二宮距縣東南三十五里○寰宇記云馬融讀  
書臺在縣東北三十七里按志以縣東南有芒谷  
芒水出焉谷中有漢馬融石室乃其讀書處○太  
微峯在縣東南四十里形勢嵯峨直接太虛又其  
地有五峰高峙秀拔俗呼五福山越十里爲玉女  
洞洞門高四尺傍有飛泉甚甘飲者愈疾水經注

曰芒水經玉女房水側山際有石室世謂之玉女房也蘓子瞻至其處愛此水旣自致兩瓶恐後復取爲使者紿因破竹爲契使主僧藏之以爲往來之信戲謂之調水符○姜維嶺本名沉嶺在縣南五十七里蜀延熙中大將軍姜維率衆出駱谷經沉嶺卽此處也唐武德初高祖于此立關名駱谷關距縣西南百二十里道通梁州魏畧云少帝正始四年曹爽伐蜀諸軍入駱谷三百餘里不得前牛馬轉運死畧盡蓋由褒斜而達梁州爲正路若取道駱谷則險而且迂云○注水經曰渭水屈南山就谷北逕大陵西與就水合就水歷竹園北與黑水合上承三泉就水之右三泉竒發言歸一瀆北流左逕就水就水又北流注于渭渭水又東合田谿水水出南山田谷北流長楊宮西又北逕蓋屋故城西又東北與一水合水上承蓋屋南泉北逕其縣東又北注田谿田谿水又北注于渭東有涌水出南山赤谷東北流逕鞏圃西亦謂之仙澤又北逕望仙宮又東北耿谷水注之水發南山耿谷北流與柳泉合東北逕五柞相去八里並以樹名宮亦猶陶氏以五柳立稱矣○按長安志潁水

在縣東北五里望仙澤在縣東南三十里周十里澤中有石盤龍鱗甲動有雲氣聲若鳴鐘又五里卽長楊宮故址稍南爲仙遊潭濶二丈其水深黑號五龍潭唐時每歲降中使投金龍于此其西爲董龍社舊圖經曰董龍蓋屋人家貧村社衆人祭社逐出之龍乃以泥造針祭焉後穿地得黃金因大富遂名董龍樹○唐郎士元蓋屋縣鄭磯宅送錢大詩暮蟬不可聽落葉豈堪聞共是悲秋客那知此路分荒城背流水遠鴈入寒雲陶令門前菊餘花可贈君

三原縣

在府城北九十里

後魏太平元年置曰三原者此地南有鄠原西有孟侯原北有白鹿原也本漢池陽縣地苻秦于縣西北之嶽葉山置三原護軍按嶽葉山去今治四十里一名嵯峨山山有五峰相連如筆架踞天齊原之上原長七里南連白鹿北連嶽葉清谷水出焉一名鬼谷卽蘓秦張儀師事鬼谷先生處○按志天齊原在縣西北二十里又十里爲堯門山又縣北二十里爲浮山○寰宇記太白渠在縣南十里清峪水入焉又十里爲黃白城後漢李傕輔政

天子東遷三輔饑歉乃移保黃白城卽此處矣城內有秦時曲梁宮今廢○注水經曰渭水又東得白渠枝口又東與五丈渠合水出雲陽縣石門山謂之清水東南流歷黃嶽山西歷泉南出渭之清水口又逕黃白城西本秦曲梁宮也南絕白渠屈而東流謂之曲梁水東南絕白渠瀆又東南入萬年縣謂之五丈渠又逕藕原東東南流注于渭水○鄭渠又東逕捨車宮南絕冶谷水鄭渠故瀆又東逕嶽山南池陽縣故城北又東絕清水又東逕北原下濁水注焉水上承雲陽縣東大黑泉東南流謂之濁谷水又東南出原注鄭渠又東歷原逕曲梁城北又東逕太上陵南原下北屈逕原東與沮水合分爲二水一水東南出卽濁水也至白渠與澤泉合俗謂之漆沮水○寰宇記云永安故城在縣北五十里卽後魏北雍州城也周地圖記明帝孝昌二年蕭寶寅逆亂關右刺史毛洪賓立義柵以捍賊永安元年于此置北雍州唐肅宗勅改爲建京郡旋廢○志云縣故城本漢池陽縣址距今治東北三十里元至元間始移于龍橋鎮今沿之唐韋應物春日郊居寄三原元少府偉詩谷

鳥時一轉田園春雨餘光風動林早高  
函照日初獨飲礪中水吟詠老氏書  
城闕應多事誰憶此間居宋歐陽修送王尚哲三原尉初仕便西轅驪駒  
兩佩環山河識天府風雨度函關桑柘千疇富人煙萬井閒欲爲京洛詠  
應苦簿書間○縣有浪井見唐書開元十六年三月京兆三原浪井出宋志  
曰浪井不鑿自成王者清靜則應○塚宅記云唐永康陵在縣西北清河鄉  
葬高祖大父景皇帝也高祖獻陵在縣東北浮陽鄉有廟陪葬諸王十六  
公主一功臣六○德宗崇陵在縣西北之堯山山下爲豁山空洞如門故名○  
武宗端陵在縣東北神泉鄉文宗莊陵在縣西北太平鄉按唐貞元四年遣左  
諫議大夫修葺陵寢自獻昭而下有八在三原者有四又訪長孫皇后故宅在  
縣之樓宅村村南有美人渠相傳長孫皇后濯髮于此○寶應金輪寺在縣東  
北靖川乃李靖舊宅基唐寶應間置寺因以爲名國朝金鉞詩杪權曲徑草青青  
地布黃金佛有靈東土老禪眉似雪曇花香裏獨翻經○俠士傳唐李靖字藥師  
從太宗定天下封衛國公三原人宅有古碑斷缺國朝王恕詩翊運成



功屢出奇文韜武畧荷尹知故鄉居第今何在獨  
有行人看古碑○金石錄云唐御製通微道訣碑  
肅宗皇帝勅道士達觀大師楊重灣于渭北大化  
觀立石距今縣東三十里○唐高祖神堯皇帝廟  
碑在獻陵側宋開寶年重修臣扈蒙記○唐故右  
武衛將軍臧懷恪神道碑銘顏真卿撰文○唐故  
冠軍大將軍臧懷亮碑李邕撰文并書俱在北原  
上○唐故戶部尚書揚州大都督李國貞神道碑  
銘權德輿撰文○唐銀青光祿大夫進襄陽郡王  
路應神道碑銘韓愈撰文○元封異國公郝和尚  
神道碑銘翰林學士王磐撰文○大明光祿大夫  
柱國太師端毅王公神道碑銘太學士李東陽撰  
文按公諱恕字宗貫別號石渠老人弘治初爲吏  
部尚書選法公嚴請託不行所著有介菴奏議石  
渠意見等書卒葬在縣西二里之西園卽公別業  
也吳郡沈周有西園八詠賦○唐韋端符觀李衛  
公故物記云二年冬端符于三原縣令坐中揖其  
群官有客曰李丞彥芳是衛公之胃也其家傳賜  
書與他服器十餘物俱無恙頃之端符卽丞居居  
爲客謁丞延入就次端符因跪請曰藉君僕射公

之嗣因願見僕射公之烈雖其事辭史記或闕畧  
具天下耳舌久矣聞君世傳文帝詔與公服物者  
願得一觀丞慘慘曰諾卽其家偃僂躍步奉賜書  
一函他物一器出發視有玉帶一首末爲玉十有  
三方者七挫兩隅者六每綴環爲附而固以金丞  
曰傳云環者列佩用也玉之粹者若含怡然澤者  
若渙釋然公擒蕭銑時高祖所賜于闐獻玉帶十  
三此其一也素錦袍一其襟袂促小裁制絕巧密  
紫文綾襖一促製小袖如袍其爲文林樹於上有  
馳馬射者又雜爲後猓虎羆橐駝者靴袴一往來  
爲鈎屬鏤斂文疑非華人所爲也自始傳至於今  
莫能名其物象笏一差狹不類今笏者佩筆一以  
木爲管設刻飾以金別爲金環以限其間火鏡一  
大觴一小觴一筭囊二柳盃一蓋嘗佩於玉帶環  
者十三物亡其五存者八帝爲兒時與公子某年  
上下文帝命居宮中侍我兒戲卽賜皇子服物黃  
綾袍皆爲龍鸞文素錦襖絳五采爲若鳥者素錦  
半袖小笏皆緻巧今之良工不能也文帝賜書二  
十通多言征討事厚眷勞苦信必威賞而已其兵  
事節度皆付公吾不從中制也槩公疾親召者數

四其一日有晝夜視公病大老嫗遣來吾欲熟知  
公起居狀丞曰權文公視此詔涕泣曰君臣之際  
乃如是耶端符既畢觀中若有物擊惻其心者於  
玉帶見遠方致物而上不專有以賜有功也於文  
錦衆物見其時之工志工不志靡也於賜公子與  
皇子衣服見視臣有猷兒也於詔征討見擇將材  
付將職也上尚不中制其事旁他可動哉於問公  
疾見上憫公如家人之視子姪也公之勞烈如是  
其大固有以感之獨推其運無不信也丞曰子觀  
我故物異他人之觀亦似動色隱心者於霜雪變  
時每閱省是物人雅謂子工文辭幸爲記吾得觀  
以慰吾思慕也故爲衛公故物記按今志中佚故  
書之

渭南縣 在府城東一  
百四十里

漢初有渭南郡因以名縣述征記謂置自苻堅也  
本新豐縣地後魏孝昌三年置南新豐縣于明光  
原西魏廢帝始改今名隋文帝西幸以原上乏水  
乃移今理口長安志云明光原在縣東四里卽新  
豐原也又東有半日村以此村山高菽虧陽景惟  
及其半故名唐大曆間郎士元居此○縣城內有

姜泉相傳周尚父所鑿有梁泉相距東南二百步  
唐陸贄爲尉其詩曰環渠流渺渺夾砌樹陰陰自  
註云縣郭多引流泉蔭以雜樹盛夏無暑又有三  
門水卽秦始皇引渭貫都以象天漢者晉書曰漢  
祖龍興矯秦之弊分內史曰三部三內史者渭南  
河上地也○縣西門外有漕橋跨漕水上卽經之  
首水矣首水出縣西南石樓山北經秦步高步壽  
二宮合東暘谷水而注于渭經云渭水又東得東  
暘谷水西得西暘谷水正南出廣鄉原北垂入渭  
是也三秦記云東暘谷爲晉王子年隱居處弟子  
受業百餘人鑿穴而居後因石季龍兵亂遷于倒  
獸山一名玄象山按志漕水源出縣西南石鼓山  
一名石樓山東暘谷在縣東十三里玄象山在縣  
東南三十七里步壽宮在縣西南三十里渭水距  
縣北十四里西自臨潼縣來流入華州界○注水  
經曰渭水又東首水南倒虎山而總五水單流注  
逕秦步高宮東世名立市城歷新豐原東而北逕  
步壽宮西又北入渭渭水又過下邽故城南以邽  
戎之人來此爲縣秦有上邽故曰下邽魏志董卓  
遷長安華歆求出爲下邽令卽此○城塚記云下

邽城東南有物定倉城西京雜記以物定倉近渭  
河岸收貯五穀各先定其姓物則不涸壞俗訛爲  
武底倉○元和志云唐之下邽卽漢之蓮勺也按  
下邽故城在今縣北五十里元時始省又二十里  
爲蓮勺城○蓮勺漢縣關駟云草名也漢宣帝紀  
帝數上下諸陵嘗困于蓮勺如淳曰爲人所困辱  
也張禹自河內徙家于此隋時始省○白渠又東  
南逕蓮勺城南有鹽池縱廣十餘里其鄉人名爲  
鹵中如淳曰鹵者鹹地也又東注金氏陂陂在下  
邽東南二十里漢車騎將軍金日磾有功賜此地

按史記日磾以匈奴休屠王太子從渾邪王將衆  
五萬來降賜田于此卒因葬焉冢在下邽故城內  
東南二百步高三丈○蓮勺故城有漢光武及粟  
邑縣二城經云沮水又東逕光武故城北又東逕  
粟邑縣故城王莽之粟城也光武城去蓮勺東南  
七里粟邑詳同州白水縣下○長安志云縣東南  
有六石人趙石勒所造西魏入關移石人于府門  
外經宿仍歸本處今縣東十五里有二枚東北一  
里二枚東南七里二枚○後魏孝武陵在縣東南  
二十二里高六丈周一百二步石人虎尚存屬廣

鄉原○漢廷尉翟公塚在縣東三十五里翟公下却人○漢孝子蔡順墓在縣東南一十里有古碑○唐少傅白樂天墓在臨津北原○宋龍圖學士白敏中墓在縣東北○寇萊公墓在縣北五十里按治內儒學有三賢祠卽祀此三公○宋仁宗曹后渭南人其故里在縣東南靈臺山下至高峻其頂方平周正故以臺名有曹氏所建靈臺寺

富平縣

在府城北一百二十里

漢縣也屬北地郡前漢理在靈州迴樂鄉界曹魏移于寧州彭原縣界晉又移于縣西南之懷德城

後魏大統間乃自懷德城移今理唐開元中又移

于義亭城蓋古之鄉亭也後唐同光初割屬耀州

國朝萬曆三十八年從守臣請徑屬府蓋以吏部

尚書孫丕揚爲邑人故○志云荆山在縣西南十

里懷德故城北禹貢荆岐旣旅又曰導沂及岐至

于荆山孔安國注荆在岐山東非荆州之荆山也

帝王世紀禹鑄鼎于荆山其下有荆渠矣按懷德

縣乃後漢建安時因漢舊名於此立縣又非漢之

懷德縣也○禹貢導渭水東至于涇沮寰宇記云

涇沮水又名石川水西北自耀州華原縣界流入

按縣有石川常平二堰卽此水之支流也鄭白二渠水自雲陽谷口東入注焉今湮○三秦記云洛水出疆梁原在縣西南荆渠之側又東五里有鹹泉味同鹽井別于常泉矣○澤多泉在縣西十三里東流入漆沮河文昌渠在縣西北十七里卽引漆沮水以入渠者也又八里爲高望渠又五里爲長澤渠又十里爲白馬渠又五里爲偃武渠互相灌注舊屬義林鄉○直市在縣南十五里秦文公所剗物無二價故名又十五里爲秦穆公城西南面各崇一丈五尺東北面無牆○八公埧在縣東南二十五里其埧兩畔各有小谷象公字中心有堆故曰八公埧卽宋賀師範與金人戰處壘壁尚存○天乳山在縣西北二十五里兩峯相對類於乳形○迤山在縣西南二十五里孔氏謂之靡迤昔周東遷以岐豐之地賜秦襄公遂有周畿內八百里東至迤山是也○雨金堡在縣東南三十里周八百步有一泊每天雨水流入似金色俗以雨金呼之按史記秦獻公十八年雨金櫟陽因以名堡今地卽古櫟陽界○中山在縣北四十五里界于涇陽以其在治水西涇水東也漢書武帝元鼎

元年獲寶鼎于汾陽薦之其泉鼎至于中山氤氳有黃色蓋焉卽此處○金石錄云漢宣帝時扶風美陽縣民得寶鼎獻之有司議宜薦宗廟如元鼎故事京兆尹張敞議鼎出周都之地刺文曰王令尸臣官此徇邑賜爾旂鸞黼黻珣戈尸臣拜手對揚景命以臣詳之卽周賜大臣之鼎不足以見宗廟制曰京兆尹議當按美陽縣本秦之頻陽縣也頻山在今縣東北七十里頻水出焉卽大小石谷二澗矣秦厲公於山南立縣曰頻陽苻秦時以頻山有二土門因置土門護軍亦後魏之土門縣唐

咸亨中之美原縣也○注水經云宜君水南出土門山西謂之沮水又東南歷土門南原下東逕懷德城南城在北原上又東逕漢太上皇陵北陵在南原上沮水東注鄭渠昔韓欲合秦無東伐使水工鄭國間秦鑿涇引水謂之鄭渠渠首上承涇水於中山西瓠口所謂瓠中也爾雅以爲周焦誤矣渠並北山東注洛三百餘里以溉田中作覺欲殺之鄭國曰始臣爲間然渠成亦秦之利卒使就渠渠成而周注填闕之水溉澤鹵四萬餘頃皆畝一鍾關中沃野無復凶年秦以富疆卒並諸侯命曰



鄭渠渠瀆東逕宜秋城北又東逕中山南河渠書曰鑿涇水自中山徐廣史記音義曰關中有中山非冀州之中山也○塚廟記云西魏文帝後魏武帝二陵俱在縣東南二十五里○後周太祖文帝陵在縣西北十三里○唐玄宗陵在縣東北九十里金粟山入蒲城界○唐中宗定陵在縣西北一十五里龍泉山又五里為文帝章陵在天乳山又十五里為代宗元陵在檀山上又十五里為順宗豐陵在金甕山又四十里為懿宗簡陵在紫金山○秦王翦墓在縣東二十七里翦潁陽人○漢薄

昭墓在縣西十三里昭薄太后之弟封軹侯注水經云沮水東流逕薄昭墓南塚在北原上又十二里為司馬欣墓欣章郎長史降項羽封塞侯又十五里為李光弼墓光弼在唐有興復功卒葬長安南原勅百官送之延平門外後遷葬于此顏真卿書神道碑存○唐富平縣尉顏喬卿魯公之兄也有墓碣即魯公書大曆四年四月○金石錄載有富平尉韋器墓誌趙臯撰文吳通微楷書永泰二年十一月○又有符令奇及其子璘墓以田悅之叛令奇使子璘歸馬燧令奇遂被害贈尚書左僕

射璘加輔國將軍卒從父葬富平李宗閔撰碑文  
柳公權書○南部新書云古押衙者居富平以遊  
俠聞多竒計往往通于宮禁按虞初志所載古押  
衙爲王仙客以明珠一顆贖其故妻死後復生完  
聚卽今梨園所演明珠記豈因新書而附會之邪

醴泉縣

在府城北一百二十里


寰宇記云醴泉宮在縣東南三十里漢宣帝置宮  
傍有泉湧出宣帝聞其味如醴故名唐貞觀間重  
脩魏徵銘歐陽詢書按隋開皇置醴泉縣蓋取諸  
此本漢谷口縣地而東漢及晉之池陽縣也縣理  
古仲橋城有谷口城在其東北四十里王莽曰谷  
喙漢郊祀志公孫卿言黃帝升仙於塞門水經注  
云涇水出山之處在九峻山東仲山西謂之谷口  
卽塞門也鄭子真嘗隱于此○一統志云九峻山  
高六百餘尺在縣東北四十里其側爲承陽山左  
右有水合流入其河三輔黃圖所謂浪水也有温  
宿嶺在其處漢温宿國人內附牧飲于此唐初析  
置温秀縣以之名矣後魏書曰武帝于谷口置温  
秀寧夷二護軍此亦温秀之始也涇河遶其麓有  
其水西北自其北鎮來滙謂之涇其渡去縣東北

三十里又十里爲洪口堰元英宗至治初陝西屯田府言自秦漢至唐宋年例八月差使水戶自涇陽西仲山下截河築洪堰改涇水入白渠溉田七萬餘頃詔從之又十里卽白渠故跡○塚宅記云唐太宗昭陵在九峻山下有陪葬功臣岑文本馬周房玄齡李靖李勣魏徵高士廉尉遲敬德長孫無忌蕭瑀虞世南唐倫等諸不備述杜甫行次昭陵詩云艸昧英雄起謳歌曆數歸風塵三尺劔社稷一戎衣翼亮貞文德丕承戢武威聖圖天廣大宗祀日光輝陵寢盤空曲熊羆守翠微再窺松柏路還見五雲飛□昭陵內石刻六駿像曰青驪曰什伐赤曰特勒驃曰颯露紫曰拳毛騶曰白蹄烏皆其平竇建德王世充宋金剛劉黑闥薛仁果及東都所乘者像各有贊又有瑤臺寺在其西○唐肅宗建陵在武將山一名馮山陪葬功臣一尚父汾陽王郭子儀□五將山在縣西北二十里卽武將山也漢末辛孟隱居之所○覆甌山在縣東北四十五里又五里爲青峰山又五里爲石泉谷又三十里爲白水谷○要冊三廟一在市北一在城西二十里一在西三十五里攷漢志縣內有天齊

公牀山仙人五帝祠四所圖經俱不載○醴陵有玉仙觀相傳古仙王子喬所居有玉像一軀故云唐釋護國題醴陵玉仙觀歌王喬一去空仙觀白雲至今凝不散星垣松殿幾千秋往往笙歌下天半瀑布西行過石橋黃精採根還採苗路逢一人擎藥碗松花夜雨風吹滿又言家住在東坡白犬相隨邀我過南山石上有碁局魯使樵夫爛斧柯○文獻通考諭蒙書十四篇唐醴泉令馮伉著時縣多囂猾數犯法伉為著此書皆務農進學教以孝弟之事使鄉井間轉相勸授民風翕然丕變○唐宣宗時李君奭為醴泉令有異政考蒲當罷百姓詣府乞留慮不允群聚禱于佛祠帝校獵渭上見之問知其故時懷州刺史缺上手除君奭入謝面加笄諭左右歎伏

附錄  
卷之二

三



卷之四